



12. august 2010

UKA 2010/73

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuu-na saqqummiupparput:

**Inuit/ingerlateqatigiiffiit nunaqavissut ujaqqanik pinnerasaasiassanik inuussutissarsiutigalugit ingerlanneqarsinnaanerat siuarsaavigineqarsinnaaqqullugu siunnersuineq tapersersuinerlu annertusarneqarnissaat siunertaralugu Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(ATASSUT-ip Inatsisartuni ilaasortaataitai: Siverth K. Heilmann, Knud Kristiansen)

#### **Tunngavilersuut:**

Inuiaqatigiinnut kalaallinut siuariarnerujussuuvoq Kalaallit Nunaanni pisortat nunap pisuussutaanik piginnittussaaneq qulakkeermassuk matumanilu akisussaaffiit ingerlatsinerlu nunatsinnit tigunegarmata. Taamattorli tamanna immini naammangitsoq ATASSUT-mit isumaqarpugut.

Inuiaqatigiimmi Kalaallit pisuussutit uumaatsut annerpaamik iluaqutigissappatigit iluanaartigalugillu isumarput naapertorlugu ingerlateqatigiiffiit nunatsinneersut annertuumik piiaanermik pisuusutinillu nioqutissiornermik ingerlatsisariaqarput, matumani pingaartumik eqqarsaatigalugit ujaqqat pinnerasaasiassat erlinnartut.

ATASSUT-mit isumaqarpugut ingerlateqatigiiffinngorumaartunut aatsitassarsiornermik misissueqqaarnermik piiaanermillu ingerlataqalertussanut pisortat ernissusiortutut inissinnissaat pissusisamisuisassaq, matumani pingaartumik ujaqqat pinnerasaasiassat eqqarsaatigalugit.

Aatsitassanut ikummatissanullu inatsisip § 45-anut oqaaseqaatini nalinginnaasuni allassimavoq innuttaasut nunaqavissut immikkut akuersissuteqaqqaarnani ukiumut 100.000 kr.-it angullugit naleqartunik aatsitassanik katersisinnaasut piiasinnaallutillu. ATASSUT-miit isumaqarpugut tamanna naammangitsoq, innuttaasullu nunaqavissut pingaartumik ujaqqanik pinnerasaasiassanik inuussutissarsiutigalugu annertunerusumik atuisinnaanerat periarfissinneqartariaqartoq.

Tamanna qulakkeerneqarsinnaaqqullugu matumuuna inuit/ingerlateqatigiiffiit nunaqavissut ujaqqanik pinnerasaasiassanik inuussutissarsiutigalugit ingerlanneqarsinnaanerat siuarsaavigineqarsinnaaqqullugu siunnersuinerup tapersersuinerullu annertusarneqarnissaat siunertaralugu Naalakkersuisut sulissuteqaqqullugit peqquneqarnissaannik Inatsisartut aalajangiissasut siunnersuuteqarpugut.

Taamatut tunngavilersuuteqarluta siunnersuut Inatsisartunut suliassanngortipparput.